

四庫全書

子部

欽定四庫全書

自警編卷五

宋 趙善璡 撰

出處類

出處

韓魏公因論進退曰處去就之難者不可猛而有迹

韓魏公既解相印王丞相遺公書謂過周勃霍光姚崇

宋璟又曰為古人所未嘗任大臣所不敢天下以為

名言歐陽文忠公亦曰進退之際從容有餘德業兩全謗讟自止過周公遠矣

富鄭公韓魏公為相務推崇廉退有德之士以厲風俗知蘇公頌久次儒館不干榮利屢問所欲惟力求外以便親養遂除知潁州後富公遺公書曰若吾子出處可謂真古君子矣

胡公安國仕止久速由道據義行心之所安其欲出也非由勸勉其欲去也不可挽留朱震被召問出處之

宜公曰子發學易二十年至有成說則此事當素定矣某謂世間惟講學論政則當切切詢究若夫去就語默之幾如人飲食其飢飽寒溫必自斟酌不可決諸人亦非人所能決也某之出處自崇寧以來皆內斷於心雖游定夫謝顯道諸丈人行亦不以此謀之而後亦少悔矣浮世利名真如蠻蠓過前何足道哉

王荊公平生養得氣完為他不好做官職作宰相只喫魚羹飯得受用底不受用緣省便去就自在嘗上殿

進一劄子擬除人神宗不允對曰阿除不得又進一劄子擬除人神宗亦不允又曰阿也除不得下殿出來便乞去更留不住平生不屈也竒特

范堯夫每仕京師早晚二膳自己至僕妾皆治於家徃往鎬削過為簡儉有不能飽者雖晚登政府亦然補外則付之外厨加料幾倍無不厭餘或問其故曰人進退雖在已然亦未有不累於妻孥者吾欲使吾居中則勞且不足在外則逸而有餘故處吾左右者朝

夕所言必以外為樂而無顧戀京師之意於吾亦一佐也前輩嚴於出處每致其意如此

司馬光為相每詢士大夫私計足否人怪而問之光曰儻衣食不足安肯為朝廷而輕去就耶

王荊公作宰相只喫魚羹飯得受用底不受用緣省便去就自在汪信民嘗言人常咬得菜根則百事可做信斯言也

賈黷廷試第一往謝杜祁公公獨以生事有無為問

賈退謂祁公門下士曰黷以鄙文冠天下而謝於公公皆不問而獨在於生事豈以黷為不足魁乎公聞而言曰凡人無生事雖為顯官不能無俯仰依違進退不輕今賈君名在第一則其學不問可知其為顯官則又不問可知衍獨懼其生事不足以致進退不輕而道不行而已何怪焉賈為之歎服

歐陽文忠公初坐論救范公仲淹遠貶三峽後元昊

反范起為環慶帥辟公掌牋奏公歎曰吾初論范  
公事豈以為已利哉同其退不同其進可也遂辭  
不往

呂氏雜志云或問二程先生以呂公溫公出處為有  
優劣先生云正不如此呂申公世臣也不得不歸  
見上司馬公爭臣也不得不退處蓋自熙寧初正  
人端士相繼屏伏上意常不樂以為諸賢不肯為  
我用故正獻公求在京官祠以明不然上意始大

喜

忠文范蜀公鎮在許范公祖禹謁告省覲上遣使宣問賜銀百兩仍頒手詔龍茶命公賚賜蜀公初朝廷既相溫公申公詔起蜀公欲以門下侍郎處之蜀公以書問出處於祖禹公以謂不當起蜀公得書大喜曰是吾心也凡吾所欲為者君實已為之矣何用復出又與親舊云比亦欲出矣而三郎勸止遂已三郎乃

祖禹第行家

義命

伊川先生語錄云賢者惟知義而已命在其中中人以下乃以命處義如言求之有道得之有命是求無益於得知命之不可求故自處以不求若賢者則求之以道得之以義不必言命又云君子以義安命小人以命安義

或問家貧親老應舉求仕不免有得失之累何修可以免此伊川先生曰此只是志不勝氣若志勝自無此

累家貧親老須用祿仕然得之不得為有命曰在己  
固可為親奈何曰為己為親也只是一事若不得其  
如命何孔子曰不知命無以為君子人苟不知命見  
患難必避遇得喪必動見利必趨其何以為君子然  
聖人言命蓋為中人以上者設非為上智者言也中  
人以上於得喪之際不能不惑故有命之說然後能  
安若上智之人更不言命惟安於義借使求則得之  
然非義則不求此樂天者之事也上智之人安於義

中人以上安於命若乃聞命而不能安之者又其下者也

問富貴貧賤壽夭固有定分君子先盡其在我者則富貴貧賤壽夭可以言命若在我者未盡則貧賤而天理所當然富貴而壽是為徼倖不可謂之命伊川先生曰雖不可謂之命然富貴貧賤壽夭是亦前定孟子曰求則得之捨則失之是求有益於得也求在外者也求之有道得之有命是求無益於得也求在外

者也故君子以義安命小人以命安義

范內翰祖禹每誦董仲舒之語曰正其義不謀其利明其道不計其功謂沖曰君子行已立朝正當如此若夫成功則天也

胡公安國仕止久速由道據義行心之所安也其欲出也非由勸勉其欲去也不可挽留朱震被召問出處之宜公曰子發學易二十年至有成說則此事當素定矣某謂世間惟講學論政則當切切詢究若夫去

就語默之幾如人飲食其飢飽寒溫必自斟酌不可  
決諸人亦非人所能決也

韓魏公尤知命每誠其子曰窮達禍福固有定分枉道  
以求之徒喪所守慎勿為也余以孤忠自信未嘗有  
夤緣憑藉而每遭人主為知已今忝三公所恃者公  
道與神明而已矣焉可誣哉其自守如此

胡文恭公宿平生守道不以進退為意在文館二十餘  
年每語後進曰富貴貧賤莫不有命士人當修身俟

時無為造物者所嗤世以為名言

東陽胡百能跋邵德升分定錄云先君嘗言人生所享厚薄各有定分世有以智力取者自謂已能往往不顧名義殊不知皆其分所固有初不可毫末加也所可加者徒得小人之名而不悟悲夫百能佩服斯訓未嘗不以語朋舊也

徐師川歸洪州欲不復來先生問之曰公免得仕宦否若端的有以自贍不必復來固好第亦須看仕宦如

何師川曰亦以免仕宦未得曰如此則當復來供職  
仕宦處處一般既免未得須復為他官逃此之彼彼  
亦有不安處是無地可以自容也師川曰來此復為人  
所羅織陷於禍奈何曰顧吾所自為者如何耳苟自  
為者皆合道理而無愧然而不能免者命也不以道  
理為可憑依而徒懼其不免則無義無命矣師川曰  
極是亦待來此若做不得去之未為晚又言人只為  
不知命故纔有此事便自勞攘若知徹便於事無不

安孔子曰天生德於予桓魋其如予何固嘗解云使  
孔子不免於桓魋之難是亦天也桓魋其如何哉蓋  
聖人之於命如此夫富貴死生人無與焉何尤人之  
有孟子分明為減倉所毀不遇魯侯而以為不遇非  
減倉之力蓋知命也

龜山語錄

劉彝一日謁曾魯公公亮魯公曰久知都官治狀屢欲  
進擢然議論有所未合姑少遲之吾終不忘也彝曰  
士之淹速訛仲亦皆有命今姓名已蒙記錄而尚屈

於不合之論亦某之命也魯公嘆曰比來士大夫見執政未始不有求求而不得即多歸怨而君乃引命自安吾待罪政府行十年未見如君之言也

唐質肅公一日自政府歸語諸子曰吾備位政府知無不言桃李固未嘗為汝等栽培而荆棘則甚多矣然汝等窮達莫不有命惟自勉而已

內翰范公鎮三疏力詆王安石青苗之法不行即請致仕疏凡三上聞者皆為公懼安石怒公落翰林學士

致仕公以表謝曰臣雖乞身而去敢忘憂國之心望  
陛下集羣議為耳目以除壅蔽之姦公既得謝蘇軾  
徃賀之曰公雖退而名益重矣公愀然不樂曰君子  
言聽計從消患於未萌使天下陰受其賜無智名無  
勇功吾獨不得為此命也夫使天下受其害而吾厚  
其名吾何心哉

范忠宣公知襄城縣伯兄久病心疾公承事照管湯藥  
飲食居處衣服必躬必親如孝子之事嚴父賈文元

守北都辟掌機密召編校祕閣書籍皆以兄病辭不赴富文忠公責之曰臺閣清資人豈易得小官出常調亦難事何必苦辭公曰富貴有命

范忠宣公奏疏乞將呂大防等引赦原放辭甚懇至忤大臣章惇落職知隨公草疏時或以難回觸怒為解萬一遠謫非高年所宜公曰我世受國恩事至於此無一人為上言者若上心遂回所繫非小設有不從果得罪死復何憾命家人促裝以俟謫命公在隨幾

一年素苦目疾忽全失其明上表乞致仕章惇戒堂  
吏不得上懼公復有指陳終移上意遂貶公武安軍  
節度副使永州安置命下公怡然就道人或謂公為  
近名公聞而嘆曰七十之年兩目俱喪萬里之行豈  
其欲哉但區區愛君之心不能自己人若避好名之  
嫌則無為善之路矣每諸子怨章惇忠宣必怒止之  
江行赴貶所舟覆扶忠宣出衣盡濕顧諸子曰此豈  
章惇為之哉至永州公之諸子聞韓維少師謫均州

其子告惇以少師執政日與司馬公議論多不合  
得免行欲以忠宣與司馬公議役法不同為言求  
歸白公公曰吾用君實薦以至宰相同朝論事不  
合即可汝輩以為今日之言不可也有愧而生者  
不若無愧而死諸子遂止

蘇公頌之孫曰祖父知滄州陞辭上曰朕屢欲用卿  
輒為事奪豈非命耶然卿直道久而自明祖父頓

首謝

扈載顯德中以文章有名朝議以合為知制誥樞密使王朴力薦之久未除改朴詣中書問李穀穀曰非不知其文學但斯人命薄不能荷負耳朴曰公當以才進人何言命耶未幾命載知制誥及召為學士席未暖而卒識者以為穀能知人朴能薦士

萬事真實有命由人力計較不得吾平生未嘗干人在書局亦不謁執政或勸之吾對曰他安得陶鑄

我自有命在若信不及風吹草動便生恐懼憂喜

枉做作閒工夫枉用却閒心力信得命及便養得

氣不折挫

謝上蔡語錄

君子當守道崇德蓄價待時爵祿不登信由天命  
須求趨競不顧羞慙比較才能斟量功伐厲色  
揚聲東怨西怒或有劫持宰相瑕疵而獲謝或  
有喧聒時人視聽求見發遣以此得官謂為才  
力何異盜食致飽竊衣致溫或世見躁競得者

便謂弗索何獲不知時運之來不求亦至矣見  
靜退未遇者便謂弗為胡成不知風雲不興徒  
求無益也凡不求而得者焉可勝算乎汝曹勉

之

顏氏  
訓

蘇文忠公平生於人見善稱之如恐不及見不善斥  
之如恐不盡見義勇於敢為而不顧其害用此數  
困於世然終不以為恨孔子謂伯夷叔齊古之賢  
人曰求仁而得仁又何怨公實有焉

恬退

呂正獻公著既中第詔叙次所業以進將召試館職  
公謙避終無所進朝廷知其意不復索所業令徑就  
試亦不赴故仁宗心重之及領南曹因引選人對便  
殿奏事畢帝謂公曰知卿恬退有顏氏之節時仁宗  
臨朝淵默雖貴近亦罕聞德音公以小官對獨被褒  
語

范忠文公鎮字景仁善文賦場屋師之為人和易修敷

薛簡肅公奎宋景文公祁皆器重之補國子監生及貢院奏名皆第一故事殿廷唱第過三人則為奏名之首者必抗聲自陳以祁恩雖考校在下天子必擢真上列以吳春卿育歐陽永叔之耿介猶不免從衆景仁獨不然左右與並立者屢趣之使自陳景仁不應至七十九人始唱名及之景仁出拜退就列訖無一言衆皆服其安恬自是始以自陳為耻舊風遂絕後參知政事王公薦召試學士院詩用彩霓字學士

以沈約郊居賦雌霓連蟠讀霓為入聲謂景仁為失韻由是除館閣校勘殊不知約賦但取聲律便美非霓不可讀為平聲也當時有學者皆為景仁憤鬱而景仁處之晏然不自辨考校勘四年應遷校理丞相龐公薦景仁有美才不汲汲於進取特除直祕閣至道初呂蒙正罷相以僕射奉朝請上謂左右曰人臣當思竭節以保富貴呂蒙正前日布衣臣擢為輔相今退在班列寂寞想其日穿望復位矣劉昌言曰蒙

正雖驟登顯貴然其風望不為忝冒僕射師長百僚資望崇重非寂寞之地且亦不聞蒙正之鬱悒也况今巖穴高士不求榮達者甚多惟若臣輩苟且官祿不足以自重矣上默然又嘗言士大夫遭時得位富貴顯榮豈得不竭誠以報國乎錢若水言高尚之人固不以名位為光寵忠正之士亦不以窮達易志操其或以爵祿恩遇之故而效忠於上此中人以下者之所為也上然之及劉昌言罷上問趙鎔等曰頗見

昌言否鎔等曰屢見之上曰涕泣否曰與臣等談多至流涕上曰大率如此當在位之時不能悉心補職一旦斥去即汎瀾涕泗若水曰昌言實未嘗涕泣鎔等迎合上意耳若水因自念上待輔臣如此蓋未嘗有秉節高邁不貪名勢能全進退之道以感動人主遂貽上之輕鄙將以滿歲移疾遂草章求解職會晏駕不果上及今上之初年再表遜位得請考李端明  
辨疑謂非

呂許公夷簡聞包拯之才欲見之一日待漏院見班次有包拯名頗喜及歸又問知居同里巷意以拯欲便於求見無幾報拯朝辭乃就部注一知縣而出尤奇之遽使人追還遂薦對除裏行自此擢用

富鄭公韓魏公為相務推尚廉退有德之士以勸厲風俗知蘇公頌久次儒館不干榮利屢問所欲惟力求外以便親養遂除知潁州後富公遺公書曰若吾子出處可謂真古君子矣

待制王公質子野充職館殿二十餘年同舍皆顯官公介然不動惟求外補當國者非戚必舊未嘗折顏色屈議論以合其意

韓公維不好進篤志問學嘗以進士薦禮部父任執政不就廷試乃以父任守將作監主簿丁外艱服除闔門不仕仁宗患播紳奔競諭近臣曰恬退守道者旌擢則躁求者自當知耻於是宰相文彥博宋庠等言公好古嗜學安於靜退乞加甄錄以厚風俗召試學

士院辭不赴除國子監主簿

文潞公為相因進對言嘗聞德音以循紳多務奔競非  
裁抑之何以厚風俗莫若稍旌恬退之人則躁競者  
自知愧耻乃薦王安石韓維張瓊皆擢用焉

轉運黃虞部好舉時才之士張忠定公詠勸曰大凡舉  
人須舉好退者庶謹知耻若舉之則志節愈堅少有  
敗事莫舉奔競者奔競者能曲事諂媚求人知已若  
舉之必能矜才好利累及舉官故不少矣其人既解

奔競將自得之何暇吾舉

王文正公時諫議大夫張師德謁向文簡公曰師德兩  
諸王相公門皆不得見恐為人輕毀望公從容明之  
一日方議知制誥公曰可惜張師德向公曰何謂公  
曰累於上前說張師德名家子有士行不意兩及吾  
門狀元及第榮進素定但當靜以待之耳若復奔競  
使無階而進者當如何也向公方以師德之意啟之  
公曰旦處安得有人敢輕毀人但師德後進待我淺

也向公固稱師德適有闢望公弗遺公曰第緩之使  
師德知聊以戒貪進激薄俗也

韓忠獻公琦監左藏庫時方貴高科多徑去為顯職公  
獨滯於筦庫衆以為非宜公處之自若不以為卑冗  
職事亦未嘗苟且

熙寧三年司馬溫公修歷代君臣事迹辟范公祖禹同  
編修供職秘省時王荊公當國人皆奔競公未嘗往  
謁王安國與公友善嘗諭荊公意以公獨不親附故

未進用公竟不往見後章惇拜相公知陝州罷坐貶  
永州公平生澹然無欲家人不見其喜怒之容修書  
於洛有終焉之志及登侍從無時不求退每被除擢  
必力辭不得已然後就職及被貶責處之怡然嘗曰  
吾西蜀一布衣耳今復不仕何為不可

呂正獻公晦叔每事持重近厚然去就之際極於介潔  
其在朝廷小不合便脫然無留意故歷事四朝無一

年不自引求去

家塾記

建州有君子曰胡憲曰劉勉之非身所得外一毫不受此後生所宜法也近見世人緣親姻故舊干求差遣為世鄙笑尤可戒也頃年嘗聞元祐間范忠宣作相其子子夷名正平第

七當入遠忠宣欲以恩例換近地子夷堅不肯曰當入遠

不欲以恩例求僥倖前人立志例皆如此舍人

答書

韓魏公言希文師魯畏王沂公師魯初入館編校四年復欲得一差遣遂至中書授錢廷年例沂公徐曰學士自待何

為在錢廷年等列耶師魯終身以為媿別

錄

處患難

患難即理也隨患難之中而為之計何有不可文王困羑里而演易若無羑里也孔子圍陳蔡而弦歌若無陳蔡也顏子簞食瓢飲而不改其樂原憲衣敝履穿而聲滿天地至夏侯勝居桎梏而談尚書陸宣公謫忠州而作集驗此無他若素生患難中而安之也中庸曰君子無入而不自得焉其是之謂乎

章子厚與蘇東坡書云慎靜可以處患難東坡佩服

嘉嘆不已

范忠宣公在隨幾一年州事毫髮必親客至談笑終日無倦色公素苦目疾忽全失其明因上表乞致仕章惇戒堂吏不得上蓋懼公復有指陳終移上意逮貶公武安軍節度副使永州安置命下公怡然就道切戒子弟不得小有不平意曰不見是而无悶爾曹勉之人或謂公為近名公聞而嘆曰七十之年兩目俱喪萬里之行豈其欲哉但區區愛君之心不能自己

人若避好名之嫌則無為善之路矣

行狀

又聞見

忠宣欣然而往每諸子怨章惇忠宣必怒止之江行  
赴貶所舟覆扶忠宣出衣盡濕顧諸子曰此豈章惇  
為之哉至永州公之諸子聞韓維少師謫均州其子  
告惇以少師執政日與司馬公議論多不合得免行  
欲以忠宣與司馬公議役法不同為吉求歸白公公  
曰吾用君實薦以至宰相同朝論事不合即可汝輩  
以為今日之言不可也有愧而  
生者不若無愧而死諸子遂止

范忠宣公安置永州課兒孫誦書躬親教督常至夜分  
在永三年怡然自得或加以橫逆人莫能堪而公不  
為動亦未嘗含怒於後也每對賓客惟論聖賢修身

行已餘及醫藥方書他事一語不出口而氣兒益康寧如在中州時

陳忠肅公瓘謫台州朝旨不下司行移峻急所過州郡皆令兵甲防送不得稽留至台久之人莫敢以居屋借賃者暫館僧舍而郡守以十日之法每遣廂巡起遣故十日必為之遷一寺公處之澹然不以介意到台數月朝廷起遷人石械知州事且令赴闈之官士論訕訕咸為將有處分於公也械至果揚言怖公視

事次日即遣兵官突來約束不得令出入取責鄰人  
防守狀又置邏卒數鋪前後巡察抄錄賓客書問之  
往還者雖親戚家書殆至隔絕未幾復令兵官突來  
所居搜檢行李攝公至郡郡庭垂簾如制獄大陳獄  
具蓋朝旨取索尊堯副本而憾為此以相迫脅耳公  
知其意遂發問曰今日之事豈被旨耶憾非所料失  
措而應曰有書劄子卷簾出示公劄子所行蓋取尊  
堯集副本以為係詆誣之書合繳申毀棄也公曰然

則朝廷指揮取尊堯集耳追瓘至此復欲何為因問之曰君知尊堯所以立名乎蓋以神考為堯而以主上為舜也助舜尊堯何為詆誣時相學術淺短名分之義未甚講求故為人所法使請治尊堯之罪將以結黨固寵也君所得於彼者幾何乃亦不畏公議干犯名分乎請具申瓘此語瓘將顯就誅戮不必以刑獄相恐懾不待公言畢屢揖公退尋語人曰不敢引其說尚如此良可畏也繼又幽公於僧舍使小吏

監守對榻坐卧窘辱百端人情憂怖慮有不測公安之不以為撓憾亦終不能為害

章惇蔡卞用事所以欲殺劉元城者至矣故方竄廣東則移廣西既抵廣西復徙廣東凡甲令所載稱遠惡州軍無所不至雖盛夏令所在州軍監督日行一舍或泛海往來貶所人謂公必死然七年之間未嘗一日病年幾八十堅悍不衰此非人力所及殆天相之或問何以至此曰誠而已公貶梅州忽有所厚士類

數輩至殷勤之餘輒相向垂涕公曰豈非安世有後命乎客曰屬聞朝廷遣使入郡將不利於公願公自裁無辱公告之曰安世罪大責輕若朝廷不貸甘心東市之誅使國家明正典刑誅一戒百亦助時政之萬一何至效匹夫匹婦自經於溝瀆哉不為動使者入海島杖死元祐內臣陳衍蓋累聖相授不殺近臣惇卞屢造此禍而不克故因令使者適往諸郡以虛聲逼諸流人使其自盡也自是廣人寢知惇卞意時

公貶所有土豪緣進納以入仕者因持厚資入京師  
以求見惇犀珠磊落賄及僕隸久之不得見其人直  
以能殺公意達之惇乃見之不數日薦上殿自選人  
改秩除本路轉運判官其人飛馳徑驅至公貶所郡  
將遣其客來勸公治後事涕泣以言公色不動留客  
飲酒談笑自若對客取筆書數紙徐呼其僕曰聞朝  
廷賜我死即死依此行之謂客曰死不難矣客從其  
僕取紙閱之則皆經紀其家與同貶當死者之家事

甚悉客驚嘆以為不可及也俄報運使距郡城三十  
餘里而止翌日當至家人聞之益號泣不食亦不能  
寐且治公身後事而公起居飲食如平常曾無少異  
至夜半伺公則酣寢鼻息如雷忽聞鍾動上下驚曰  
鍾聲何太早也黎明問之鳴鍾者乃運判公一夕嘔  
血而斃矣明日有客唁者曰若人不死則公未可知  
矣然公亦無喜色於是見公處死不亂如此惇等謀  
害公既不克是時昭懷寵冠六宮隆祐幽廢惇乃以

公頃論禁中雇乳母事媒孽之始鄒志完亦嘗諫立  
劉氏坐竄嶺外至是詔應天少尹孫橐以檻車抵二  
公貶所欲收以致京師至泗濱聞哲宗登遐徽宗即  
位置郵走赦孫即聞於朝乃不收

唐介既南遷朝中士大夫以詩送者甚衆獨李師中待  
制一篇頗為傳誦詩云孤忠自許衆不與獨立敢言  
人所難去國一身輕似葉高名千古重於山並遊英  
俊顏何厚未死姦訛骨已寒天為吾皇扶社稷肯教

夫子不生還介至神宗朝果大用官至執政時人以為詩讖之驗

魯公已罷政言路率公素所不合者未敢顯言排公迺言元符未有外臣上書議及宮禁因疏大臣數人嘗有是議而竄曾公肇名其間坐奪兩官徙居岳州明年秋治上封事異趣者千餘人因追咎公草求言詔貶濮州團練副使汀州安置在汀二年杜門不與人接日閱書數卷而已室內僅容一榻坐卧其

中若將終身焉人不堪其憂而公處之裕如也其量過人遠矣

行述

蘇文忠公謫惠州獨以少子過自隨瘴癘所侵蠻蜓所侮胷中泊然無所芥蒂人無賢愚皆得其驩心疾苦者畀之藥殮斃者納之囊又率衆為大橋以濟病涉者惠人愛敬之居三年大臣以流竄者為未定也四年復以瓊州別駕安置昌化昌化非人所居飲食不具藥石無有所就官屋以庇風雨有

司猶謂不可則買地築室昌化士人畚土運甓以為樂時從其父老遊亦無間也

墓誌

蘇子由崇寧中居潁昌方以元祐黨籍為罪深居自守不復與人相見逍遙自處終日默坐如是者幾十年以至於沒亦人所難能也

呂氏雜志

紹聖間伊川先生有涪州之行自涪還洛氣貌容色髭髮皆勝平昔門人問何以得此先生曰學之力

大凡學者學處患難貧賤若富貴榮達即不須學也

張無垢謫居南安了無慍懟之態至則閉門謝客以經史自娛縕袍糲食家人輩幾無以自存親知聞之爭餽遺以奉公皆謝遣之廣帥時致竊金公曰贐惠不遺舊友朋之義也濫窮而苟取吾何敢脂韋以適已爲悅哉悉歸之君子謂公誠樂道以自安者

無垢先生謫居凡十四年結門掃軌動止有則談  
經自樂手不停披歲久庭磚足蹟依然公題於柱  
曰予平生嗜書老來目病執書就明於此者十四  
年矣倚立積久雙趺隱然可一笑也因自號橫浦

居士

張公浚念秦檜欺君誤國使災異數見彗出西方欲  
力論時事以悟上意又念太夫人年高言之必被  
禍惡不能堪太夫人覺公形瘠問故公具言所以

太夫人誦先雍公紹聖初對方正策之詞曰臣寧  
言而死於斧鉞不忍不言而負陛下至再三公意  
遂決乃言曰當今事勢譬若養大疽於頭目心腹  
之間不決不止決遲則禍大而難測決速則禍輕  
而易治惟陛下謀之於心斷之以獨謹察情偽豫  
備倉卒檜大怒時公又以天中節手書尚書無逸  
篇具劄子為賀七月檜命臺諫論公章四五上以  
特進提舉江州太平興國宮連州居住公在連作

四德銘以示其人曰忠則順天孝則生福勤則業進儉則心逸連人相與饑之於石家傳人誦焉二十年九月移永州蓋公去國至是幾二十年退然若無能者而天下士無賢不肖莫不傾心武夫健將言公者咨嗟嘆息至小兒婦女亦知天下有張都督也

休致

歐陽文忠公在蔡屢乞致仕門下生蔡承禧因間言

曰公德望為朝廷倚重且未及引年豈容遠去也  
歐公答曰修平生名節為後生描畫盡惟有早退  
以全晚節豈可更俟驅逐乎初公在亳已六請致  
仕比之蔡逾年復請四年以觀文殿學士太子少  
師致仕公年未及謝事天下益以高公公昔守潁  
上樂其風土因卜居焉及歸而居室未完處之怡  
然不以為意

龐莊敏公籍知定州請老召還京師公陳請不已或

謂公今精力克壯年少所不及主上注意方厚何  
遽引去若此之堅公曰必待精力不文明主厭棄  
然後乃去是不得已豈止足之謂耶凡上表者九  
手疏二十餘通朝廷不能奪五年聽以太子太保  
致仕

孫宣公奭以太子少保致仕居於鄆一日置宴御詩廳  
仁宗嘗賜詩刻石所居之廳壁語客曰白傅有言多  
少朱門鏤空宅主人到老不曾歸今老夫歸矣喜動

於色復顧石守道誦易離卦九三爻辭且曰樂以忘憂  
自得小人之志歌而鼓缶不興大耋之嗟公以醇德  
與學勸講禁中二十餘年晚節勇退優游里中始終  
全德近世少比

陳恭公執中初罷政判亳州年六十九遇生日親族往  
往獻老人星圖以為壽獨其姪世修獻范蠡遊五湖  
圖且贊曰賢哉陶朱霸越平吳名遂身退扁舟五湖  
恭公甚喜即日表納節明年累表求退遂以司徒致

仕

范公景仁既退居有園第在京師專以讀書賦詩自娛客至無貴賤皆野服見之不復報謝故人或為具召之雖權貴不拒也不召則不往見之或時乘輿出遊則無遠近皆往嘗乘籃輿歸蜀與親舊樂飲賑施其貧者周覽江山窮極勝賞期年然後返年益老而視聽聰明支體尤堅強嗚呼彌使景仁枉道希世以得富貴蒙屈辱任憂患豈有今日之樂耶則景仁所失

甚少所得殊多矣詩云愷悌君子神所勞矣又曰樂  
只君子遐不眉壽景仁有馬元祐初首以詔起公曰  
西伯善養二老來歸漢室卑詞四臣入侍為我強起  
無或憚勤天下望公與溫公同升矣公辭曰六十三  
而求去蓋以引年七十九而復來豈云中禮卒不起  
詩人類以弃官歸隱為高而謂軒冕榮貴為外物然鮮  
有能踐其言者故靈澈答韋丹云相逢盡道休官去  
林下何曾見一人蓋譏之也趙嘏云早晚粗酬身事

了水邊歸去一閒人若身事了則仕進之心益熾愈無歸期矣王易簡云青山得去且歸去官職有來還自來是豈須臾忘情於軒冕耶張乖崖在蜀有一幕職官不為乖崖所禮遂獻書云秋光都似宦情薄山色不如歸意濃公謝而留之彼蓋有激而云豈誠心哉筆談言有武人忽作詩云人生本無累何必買山錢遂弃官歸此最勇決予嘗於驛壁間見人題兩句云人生待足何時足未老得閒方是閒予深味其言

服其精當而媿未能行也此與夫所謂一日看除目  
三年損道心者異矣

仁宗時朝議在官年七十而不致仕者有司以時按籍  
舉行翰林學士兼史館修撰胡宿以謂養廉耻厚風  
化宜以漸而一切以吏議從事殆非所以優老勸功  
當少緩其法使人得自言而全美節朝廷嘉其言是  
故至今行之

曾魯公亮自嘉祐秉政至熙寧中尚在中書年雖甚高

而精力不衰故臺諫無非之者惟李復圭以為不可作詩曰老鳳池邊蹲不去饑鳥臺上噤無聲魯公亦致仕而去

元豐五年文潞公以太尉留守西都時富韓公以司徒致仕文潞公慕白樂天九老會乃集洛中公卿大夫年德高者為耆英會以洛中風俗尚齒不尚官就資聖院建大廈曰耆英堂命閩人鄭奐繪像堂中時富韓公年七十九文公與司封郎中席汝言皆七十七

朝議大夫王尚恭年七十六太常少卿趙丙祕書監  
劉几衛州防禦使馮行已皆年七十五天章閣待制  
楚建中朝議大夫王慎言皆年七十二太中大夫張  
問龍圖閣直學士張燾皆年七十時宣徽使王拱辰  
留守北京貽書潞公願預其會年七十一獨司馬溫  
公年未七十文公素重其人用唐九老狄兼墓故事  
請入會溫公辭以晚進不敢班文富二公之後文公  
不從今鄭真自幕後傳溫公像又之北京傳王公像

於是預其會者凡十二人文公以地主攜妓樂就富公宅作第一會至富公會送羊酒餘不出餘皆次為會洛陽多名園古刹有水竹林亭之勝諸老鬢眉皓白衣冠甚偉每宴集都人隨觀之文公又為同甲會司馬郎中旦程太中珣席司封叔言皆丙午人也亦繪像於資聖院其夜司馬公與數公又為真率會有約酒不過五行食不過五味唯菜無限楚正議違約增飲食之數罰一會皆洛陽盛事也洛之士庶又生

祠潞公於資聖院溫公取神宗送潞公判河南詩隸  
於榜曰竚瞻堂塑公像其中冠劍偉然都人事之甚  
肅

本朝大官最享高年者凡三人曰退傅張公士遜樞相  
張公昇少保趙公槩皆壽至八十六又二人次之曰  
陳文惠公堯佐至八十二杜祁公衍至八十一又一  
人次之曰富文忠公弼壽至八十餘皆不及焉故文  
惠致政以詩寄退傅曰青雲歧路游將遍白髮光陰

得最多蓋謂是也

青箱雜記



自警編卷五